

Ladin y referendum

Te si senteda ai 9 de nuvèmber ie la Jonta provinziela stata a una che la rujeneda ladina muessa nce uni adurveda pra i referendum

Aministrasion - La lege che à valù per l referendum di 25 de utober udova mé dant la rujeneda tudèschia y taliana, perchël à i promotèures mé dat ju i tesé te chësta rujenedes. "Nosta pert ons nce fat per ladin," à sottrissà l president Durnwalder, "ma la grupa de rujeneda ladina à l dèrt che l vènie nce adurvà si rujeneda d'oma te duc i documènc dl referendum". Sun pruposta dl assessëur ladin Florian Mussner dëssel tla lege nueva per l referendum (che n ie tl lèur de lauré ora) nce uni scrit dant de adurvà la rujeneda ladina.

Crisé te scola

La Jonta provinziela se à pusizionà contra l tò demez di crisé tla classes de scola. "Uce sce da Roma o da vel' altra pert unissel dit de messèj tò ju i crisé, ne unissa chësc nia fat tla Provinzia de Bulsan," à detlarà Durnwalder. Te uni scola muessel avèi lerch l crist. Uni cumenanza de scola dëssa pona, nsci l president dla provinzia, nstës tò si deziion. "Nëus tulon su chëi che vën da oradecà cun respet, ne pertendon nia che i vènie assimilei y ti dajon nce locai da prië. Pertendon da si pert nce l respet per nëus," nsci Durnwalder.

Feries sun l luech da paura

La Jonta provinziela ie stata a una per na lege nueva n cont di criteres per cuntribuc ai luesc da paura che pieta feries. La nuviteies reverda 7/8 ponc à dit l president te cunferënza stampa. L vën susteni l frabiché, l miuramënt y ngrandimënt de cuatieres per la feries, locai per dé da maië, banies de fën, mplanc de wellnes o locai da sté deberieda, ma nce studi, analises o pruvedimènc de marketing. Da nuef iel che i cuntribuc ne possa nia mé unii dai ora a persones singules ma nce a sozietees o cooperatives. Chësta sozietees muessa vester tl reghister de Chemun, scenò sarà la Provinzia a cialé do sce i criteres vën bën respetei. Da nuef iel nce che i cuntribuc vën paiei ora aldò dla normes europees De-Minimis. La mèndra cumpèida de bestiam per giapé i cuntribuc ie unida auzada da 40 a 60 cè de bestiam. "Chësc ie uni fat ajache l davanì cun l bestiam ie tl lèur de jì juvier," à dit Durnwalder. Nueves ie nce la mesures di nvestimènc per damandé cuntribuc. L nvestimènc muessa vester sèura i 7500 euro y te tèmpe de cin' ani ne

pòssen aldò dla grandèza dl luech nia ruvé sèura 40.000 y 60.000 euro. La perzentuela di cuntribuc vën data aldò dla situazion dl luech. Per luesc che ie riei da lauré vèniel dat deplù. I caji cun passa 40 ponc de deficità de lauré l luech giapa nchin a 50% dl custimènt recunesciù, i autri nchin a 40%.

Stredes curtes per l maië

A cumpré la roba da maië per i spedei, menses y istituzions publiches dëssel uni tèt n cunscidrazion la lueges de produzion plu daujin. La Jonta provinziela ie a una cun la pruposta de lege che a medema cundizions de priesc y cualità, dëssel uni cumprà i prudoc dl post. "Ulon schivé viages y nsci defènder l ambient, chësc ie nce l'idea dla Union Europea. Tl medemo mumènt sustenions a chësta maniera nce la produziions tlo da nëus," à dit l president dla Jonta.

Manco burocrazia per cuntribuc

La documentazion che ie da mustré dant per giapé cuntribuc culturei dëssa uni smendrida a na lista dla contes. "Nchinamò fòvel debujën de mandé ite la contes uriginales, de abiné adum documènc y fé copies. Tl dauni dëssa basté na detlarazion cun na lista dla contes," à dit l president dla Provinzia. Pra cuntroi che unirà fai a cajo, muessel pona sambën uni mustrà su duta la documentazion. Aldò di resultat dla proes tla repartizion ala cultura taliana, dëssel pona uni jìt inant de chësc viers. Do l medemo sistem pòssel per l ann 2009 bele uni dat ju la documentazion per cuntribuc a sustèni dl'atività culturela ladina.

Legge nueva per defènder l ambient

La pruposta de lege per adaté y tré adum la leges che ie bele n cont dla defendura dl ambient, ie unida data pro dala Jonta provinziela. "Te chësta pruposta iel nce trat adum la defendura per flora y fauna, minerali, fossilies, l cuntrat de defendura o la regulamentazion per i raions Natura 2000," à dit Durnwalder.

Provinzia y chemuns per l'energia

L ie truepa cunzescions che à da

n fé cun l'energia che toma y passa 300 Chemuns che à fat dumandes per la produzion de strom. La Jonta provinziela à fat ora da njenië na mèisa de tratatives danter Provinzia y chemuns per stlari de plu cuestions sciche l'azions, tant che l dëssa uni paia ora o i fic. L'idea ie che pra la mèisa féjel pea 10 esperc: 5 reprezentanc dla Provinzia y 5 di Chemuns.

Capital dl tunel dl Prëner

La Provinzia de Bulsan tenirà pea a aumenté l capital dla sozietà per l tunel de basa dl Prëner. Davia che Verona ne tèn nia pea, sèurantol la provinzie de Bulsan y Trënt deberieda chësta pert. Per la Provinzia de Bulsan uel chësc di che da 6,17% arjunjeràn na partezipazion dl 6,19%.

L custimènt dl aumènt ie per Bulsan de 1,2 milions de euro.

Furmazion per piloc

I cuntribuc per la furmazion de piloc vën fermei per n ann, ajache n uel mèter a jì da nuef l sustèni per chësta furmazions che ie drèt cères.

La Jonta provinziela uel arjonjer n'acurdanza cun n zènter de furmazion per piloc de joleri y julieres che vèija dant uni ann la lerch per n sculé de Südtirol per l julier y un per l joler. Piloc che à bele scumencià si furmazion giaperà nce l ann che vën mo i cuntribuc provinziei.

Zircumvalazion de Vandoies

La ntreda per la valeda de Pfunders a Vandoies dëssa uni fata sot a tiera.

La Jonta provinziela à dat pro che l possa uni fat la proietazion ejecutiva a cundizion che l custimènt vènie teni sot ai 14 milions de euro che fova udui dant te n prim mumènt.

Zènter provinziel de biblioteca

Davia che l ie mo truep material y abinedes à la Jonta provinziela dat pro che pra l proiet dl zènter provinziel de biblioteca dëssel mo uni juntà n partimènt sot a tiera. Aldò dl president auza l custimènt da 56 a 67 milions de euro. Mo ntan chësta legislatura dëssel uni metù man de frabiché. (usp)

Y chëi che zipla?

Sce n ne possa nia plu taché su crisé te tlas, pona chi ti dà pa da lèur a duc chëi de Gherdëina che zipla crisé? Tò demez l crist te tlas èssa na gran fazon negativa per l'economia dl ziplé de Gherdëina, vedla de centeneies.

Deguni che ne se apustëssa plu n crist. N spaventon! Sà pa chësc l Tribunal d'Europa per i

dèrc umans? Bonamènter no!

Sce ve èis sperdù, pona ve diji che chësta risses dessëura ie pa bën mé minedes per n da ri.

Scenó, te duta la descucion, iel belau da stufé a tumé ite n pensier moralistich.

Ma coche dijova zech un, che ne jiva mei pea pra la pruzescions de dlèja, do che n ova cunscidrà che l n ie for manco y manco che

va pea pra la pruzescions y che l pudëssa pa pona bën vester che les ne vën ngali nia plu fates: "Iló vedi pa bën monce ie pea, dan che l vènie lascià!"

Coche di, crèier o no crèier, l crist ie for stat te tlas, l crist toca de resté te tlas, sentënza o no sentënza!

David Lardschneider